



Vuk'uzenzele

IMAHHALA

Uyetyulelwa Tekuchumana Tahulumende Nekuniketa Lwati (GCIS)

Siswati/English

Inhlaba 2015




Letivela e-Union Buildings

Likhasi 3



Luhlelo lwetempilo lolucinile lwawo wonkhe umuntfu

Likhasi 5



Usifaka njani sicelo sekubuyiselwa umhlaba

Likhasi 6

Tinsita tebantfu letibomahambangendlwana

Amukelani Chauke

Bantfu labahlala etince-nyeni tasemaphandleni talive nyalo sebatawukwati kubhalisela ticelo tekubuyiselwa umhlaba dvutane nemakhaya abo.

Indvuna Yetekutfukiswa Kwetindzawo Tasemaphandleni Netingucuko Kutemhlaba Gugile Nkwinti kamuva nje wente inchubo yekubhalisela ticelo tekubuyiselwa umhlaba yabalula ngekuvula emabhasi labomahambangendlwana lamane endzaweni letungelete iPhalamende eKapa.

"Kumele nikhumbule kutsi ngesikhatsi sesigaba sekucala, bekungekho imikhankhaso leyentiwa nguhulumende. Ngalamanye emavi, akumange kwenteke kuletsa inchubomgomo kanye nematfuba kubantfu.

"Umphumela ngukutsi bantfu etindzaweni letisemaphandleni laluhlata kanye naletu letisemadolobheni lamancane kanye nasemalokishini lasetindzaweni tasemaphandleni, labehlulekako kuya lapho bekukhona emahhovisi [kuyewufaka ticelo], balahlekelwa litfuba.

"Nyalo sesinemabhasi kanye nemaloli lamancane langumahambangendlwana laya ebantfweni, abakhulumise futsi abatjele kutsi kunelitfuba lekufaka ticelo.

"Ngako loku kukuletsa tinsita ebantfweni kunekutsi simeme bantfu kutsi bete ehhovisi," kwasho yona.

Lokuvulwa kwaletikhungo tabomahamba-

ngendlwana kuta ngemuva kwekutsi Mengameli Jacob Zuma avume Si-chibiyelo Semsetfo Wekubuyiselwa Kwemhlaba kutsi sibe ngumtsetfo mhla ti-30 Inhlaba 2014, kusenjalo kuvulwe kabusha luhlelo lwekubuyiselwa kwemhlaba lesinye sikhatsi seminyaka lesihlanu kute kunikwe litfuba labo labangamange bafake ticelo tabo esigabeni sekucala kutsi batifake.

Ngesikhatsi sesigaba sekucala - lesaphela mhla ti-31 Ingongoni 1998 - Ikhomishini Yekubuyiselwa Kwemalungelo Emhlaba yatfola ticelo tekubuyiselwa umhlaba leti-80 000.

Ngesikhatsi akhuluma Nendlu Yebaholi Bendzabuko kamuva nje ePhalamende, Mengameli utjele baholi bendzabuko kutsi kumele batihlele bona kute basite bantfu kutsi baphumelele eticelweni tabo tekubuyiselwa umhlaba.

Balinganiselwa etigidzini leti-7,5 bantfu labehlukaniswa nemhlaba wabo ngemuva kwekuba uMtsetfo Wetemhlaba wanga-1913 usayinwe wentiwe umtsetfo.

Sigaba sekucala sekufaka ticelo sentiwa emkhatsini wa-1994 kanye na-1998.

Lamanye emabhasi lamatsatfu atawetfulwa kuletinye tifundza - eMphumalanga Kapa, eFreyistata naseNyakatfo Nshonalanga.

Kwetfulwa kwalamahhovisi labomahambangendlwana kulandzela kuvulwa kwemahhovisi ekufaka ticelo la-14 kuto tonkhe tifundza letiyimfika.

Indvuna Nkwinti iphindze yatsi lamahhovisi labomahambangendlwana atimoto letakhiwe ngalokukhetsekile afakelwa ithekhinoloji le-



Indvuna Yetekutfukiswa Kwetindzawo Tasemaphandleni Netingucuko Kutemhlaba, Gugile Nkwinti, wetfule emahhovisi lamasha abomahambangendlwana atakwenta kubhalisela ticelo tekubuyiselwa umhlaba kube malula emimangweni yemadolobheni lamancane kanye nasetindzaweni tasemaphandleni.

yenta kutsi kucutjungulwe ticelo tekubuyiselwa umhlaba khona lapho.

Indvuna itsite emkhatsini waKholwane 2014 namhla ti-8 kuMabasa 2015, ticelo letitfolakele ti-54 439.

Letikhungo letibomahambangendlwana tifakelwe ithekhinoloji ledzingekako kute kucutjungulwe ticelo kuto - lokufaka ekhatsi bongcondvomshini kanye nemaphrinta.

Lebhasi iphindze yakhelwa nendlela yekuhamba lesebenta ngegezi letawuphakamisa bantfu labaphila nekukhubateka kubasusa phansi ibayise ehhovisi lelungumahambangendlwana.

Emaloli asavele asatjalalisiwe eQwaqwa, ePhuthaditjhaba eFreyistata, eMphumalanga Kapa naseGauteng kantsi atawuhamba kuto tonkhe tindzawo letahlukene.

Lihhovisi linye litawuchubeka liye eNyakatfo Nshonalanga ngeNgcici kantsi litawuhlala lapho kudzimate kube Indlovulenkulu 2016.

Luhlelo loluphelele lwalapho emabhasi

atawuya khona, kufaka ekhatsi tindzawo kanye netikhatsi, lutawendliselwa litiko kumalunga emmango kantsi luhlelo seluvele lukhona emahhovisi ekufaka ticelo elitiko la-14, emahhovisi etigidzi nome kuwebhusayithi.

Emaloli lamabili atakuya etindzaweni lapho kutakwetfulwa khona emahhovisi labomahambangendlwana kute kulungisiswe kahle ticelo.

Loku kutakuba luhlelo lwekucinisekisa kutsi banako konkhe labakudzingako kute bafake ticelo letisemtsetfweni, kusukela kubomati nome lwatiso lwebantfu nome tihlobo lokungenteka batawube bafaka ticelo endzaweni yabo, kute kucinisekise kutsi ticelo tabo atikhishelwa ngaphandle ngenca yekungabi nelwatiso.

Indvuna itsite kufakwa kweticelo kuluhlelo lwahulumende lwamahhala kantsi bantfu ngamunye labakulungele banelitfuba kudzimate kube ngumhla ti-30 Inhlaba 2019 kufaka ticelo tabo.

"Siyati kutsi kunebantfu labahamba batsatsa timali tebantfu kumalunga emmango wakitsi labangenalwatiso lolwenele babatsembise kutsi batabafakela ticelo tekubuyiselwa umhlaba esikhundleni sabo.

"Umlayeto kubantfu bakitsi ngukutsi akudzi-ngeki ukhokhe imali kute ufake sicelo sekubuyiselwa umhlaba.

"Ticelo tingafakwa kuphela kunome kuliphi lihhovisi lekufaka ticelo kulawo la-14 eveni lonkhe nome emahhovisi ekufaka ticelo labomahambangendlwana lapho tisebenti leticecshive titakube tilapho kukusita," kwasho yona.

Fundza likhasi le-6 kute utfole lwatiso lolunyenti lwekutsi ungabhalisela njani sicelo sekubuyiselwa umhlaba

Hulumende uhlose kwenta ncono tinsita

More Matshediso

Indvuna ehhovisi laMengameli lelibukene Netekuhlela, Kucaphela kanye Nekulungisa, Jeff Radebe, itsite litiko layo litawusebentisana Nelihhovisi Lelubalobalo laseNingizimu Afrika (i-Stats SA) kute kucinisekise kutsi lubalobalo lusetjentiselwa kwenta ncono kusebenta kwematiko ahulumende.

Ikhuluma eKapa kamuva nje, Indvuna Radebe itsite ematiko lamanyenti asengakabi netinhlelo tekulawula lwatiso letingito kute tikhicite imininingwane letsembekile. Nanobe kunjalo, itsite Litiko Letekuhlela, Kucaphela kanye Nekulungisa (i-DPME) lisebenta nge-mandla kubukana nalensayeya.

Yengete ngekutsi lenye yetindlalalisu letihamba embili te-DPME kuhlola umtselela wetinhlelo tahulumende emmangweni ngalokubanti.

Indvuna Radebe itsite i-DPME inelinani

selilonkhe lelinge-39 leluhlolo loluphotfuliwe, loluhlanganisa cishe tigidzigidzi letinge-R50 temali lechiftwa nguhulumende.

Itsite luhlolo lolunyenti lolwentiwe luvete umtselela lomkhulu ngembi kwekutsi lwatiswe ummango. Ngenca yaloko, kumele kwentiwe tingucuko letinkhulu ekusebenteni ngempumelelo kwetinhlelo tahulumende.

"Siseluhlelweni lwekwefulwa kumemetelwa kweluhlolo lwanga-2016/17. Nga-2014/15, kuphotfulwe imibiko yekuhlola lesitfupha lekumibiko leyangeniswa kuKhabhinethi. Sihlose kucala lokungenani luhlolo lolusiphohlongo kulomnyakamabhuku losetulu," kwasho yona.

IMFUNDVO LESISEKELO

Indvuna Radebe yengete ngekutsi luhlolo lwekucala loluphotfuliwe lwenta umehluko lomkhulu, icondzise ikakhulukati eluhlolweni lwekucala lolumayelana Netinhlelo Tekutfukiswa Kwebantfwana Basebancane (i-ECD),

lolwaholela kunchubomgomo lensha ye-ECD kutsi itfutukiswe futsi ifakwe kugazethi ngeNdlovulenkulu 2015.

"Ekhatsi kwalokunye, kutawugcilwa ekwenti ncono lizinga lekharikhulamu yeLibanga R kute kwandzise umtselela ebantfwaneni labaphuyile kanye nasetifundzeni letingasebenti kahle, kuphindze kucinise kucecshwa nekutfukiswa kwabothishela beLibanga R."

Indvuna itsite luhlolo lweLibanga R luvete kubaluleka kwekwenta ncono kunikwa kwemfundvo lesezingeni lelihle kungabi kwandzisa kuphela loko lekuhlanganisako.

KUHWEBELENA KANYE NEKUSISA

Kuhlolwa kweLuhlelo Lwekukhiphela Ngaphandle Emabhizinisi kweLitiko Letekuhwebelana Netetimboni (i-dti) kwentiwa kute kuhlolwe kutsi ingabe Luhlelo Lwekuheha Lwetinsita Temabhizinisi (i-BPS) loluniketwa yi-dti luyayivula yini imisebenti luphindze lwenyuse kusisa



Indvuna Jeff Radebe.

Iyachubeka elikhasini le-2

LOKUNGEKHATS

Bantfu labasha bayahlomisana

Noluthando Mkhize

Emmanuel Mogale, loneminyaka lenge-23, ungulomusha lotijabulisako ngekuhlomisa labanye.

Njalo ngeliviki ufundzisa bafundzi besikolwa semabanga lasetulu iKaalfontein Secondary School eTembisa, eGauteng.

Mogale ungulotnikela wenhlango lenge-nti inzuzo leyatiwa nge-IkamvaYouth, lenika bafundzi labavela emimangweni lencishwe emafuba elwati, emakhono, luhlelochumano kanye nemifombo lebayidzingako kute bafinyelele emfundvweni lephakeme nome emafubeni emisebenti nasebaphofule matikuletjeni.

"Sizatfu sekutsi ngite lapha kutewufundzisa bantfu labasha yingoba ngalesikhatsi ngenta matikuletjeni kukhona lowangifundzisa futsi wakholwa kimi nge-IkamvaYouth. Uma ngingabona linyenti lalabafundzi litfolo emamaki lamahle kanye nemifundzate enyuvesi, ngingajabula kakhulu.

"Kulomango bantfu labasha banemafuba ekuphumelela lanemkhawulo ngenca yetimo temnotfo emakhaya. Ngifuna kubona ummango lochubekelembili ngemfundvo," kwasho Mogale.

Lolu ludzaba lolungekhatsi enhlityweni yaMogale. Ngemuva kwekuphotfula matikuletjeni nga-2013, inhlango i-IkamvaYouth yasita Mogale kutfola luhlelo lwekufundziselwa umsebenzi eMakro.

"IMakro yasinika litfuba lwekufundzela umsebenzi ngekutsi siyisebentele ngaleso sikhatsi sifundza neNyuvesi yaseNingizimu Afrika sifundzela ticu te-BCom kuTekuphafa Kwemabhizinisi. Uma sesiphofule lesicu

sitawuchubeka sisebentele lenkampani.

"Uma ngabe bekungasiyo *IkamvaYouth* bingengeke ngilutfole lolwatiso, kumele ngibabonge," kwasho yena.

Mogale ufundzisa isiNgisi,, iSayensi Yemtimba, Sepedi, Ijografi neSifundvo Sekuphila.

"Ngiyakutsandza kutinikela. Kunginika umcondvo wekujabula loku mine njengemuntfu losemusha ngikwati kuhlomisa labanye bantfu labasha ngibuyisele lengikutfolile emmangweni."

IkamvaYouth yasungulwa nga-2003 yabhaliswa ngalokusemsetfweni nga-2004. Lenhlangano inematgati eKhayelitsha, eNyanga naseMasiphumelele eNshonalanga Kapa, e-Ivory Park eGauteng, eMkhumbane (e-Cato Manor) kanye naseMolweni KwaZulu-Natal.

Kufundzisa kwentiwa ntsambama sekuphume sikolwa, ngeMigcibelo ekuseni nange-maholide esikolwa.

Juliet Moseamedi, 18, longumfundzi weLibanga le-11 eKaalfontein Secondary lofuna kufundzela tifundvo tebiomedical ngemuva kwekuphotfula matikuletjeni, utsi kusukela wajoyina *IkamvaYouth* kufundza kwakhe sekube ncono.

"Njengoba ngihlala elokishini, njalo ngemuva kwekuphuma kwesikolwa besihlala phansi nebangani bami singenti lutfo. Lona ngumkhuba webantfu labasha endzaweni yakitsi. Bekungekho kukhutsateka kwenta umsebenzi wami wesikolwa futsi bengingawuboni nje-ntfo lehamba phambili."

"Ngesikhatsi ngifika e-Ikamva ekucaleni kwemnyaka ngagcugcutelwa kutsi ngigcile emsebenzini wami wesikolwa kantsi nyalo loku sekutsela titselo. Emamaki wami aya ngekuba ncono kantsi nelizinga lami lekuvisisa umsebenzi wami wesikolwa selincono," kwasho Moseamedi.

Ngekusho kwaClemence Msindo, longu-Mchumanisi weLigatja le-IkamvaYouth eSifundzeni saseGauteng, bafundzi babhalisa



Emmanuel Mogale uhlohlomisa ummango.

e-IkamvaYouth ngesikhatsi benta Libanga le-11 nale-12.

"Nga-2014 besinebafundzi laba-38 labenta matikuletjeni labajoyina *IkamvaYouth* kantsi saba nalange-87% elizinga lekuphumelela; nga-2013 saba nala-100% elizinga lekuphumelela."

Lini kantsi lingetulu kwalange-80% ekomiti yebaphatsi baseKhayelitsha ngulabo labazuzakuloluhlelo ngaphambi kwehahafu yalabatini-kele emagatjeni lasanesikhatsi lesidze ngulabo bebabafundzi ngaphambilini.

Nga-2012, *IkamvaYouth* yatsatsa bafundzi laba-743 kuwo onkhe emagatja lasikhombisa.

Msindo utsi lenhlangano iphindze yeluleke ngemisebenti, lokuvulekele ummango iphindze ifundzise ngeSandvulelangulazi (i-HIV) kanye Nengculazi (i-AIDS) kanye nekweleleka.

"Umfundzisi unikwa bafundzi labasihlanu kutsi abasite ngemisebenti wabo wesikolwa lowentiwa ekhaya. Loku kucinisekisa kutsi bafundzi batfola kunakwa lokudzingekako."

Ikamva iphindze ivulekele wonkhe umuntfu lofisa kutinikela.

Labo labatsandza kutinikela bangavakashela ku: www.ikamvayouth.org.za kute batfole lwatiso lolunyenti

Kuvula emafuba elusha lwaseNingizimu Afrika

Amukelani Chauke

Lusha lwaseNingizimu Afrika kumele lulandzele sibonelo SebaFundzi banga-1976 babe bakhi belive ngekutsi bahlose kuba bosomabhizinisi labatawudlala indzima lekhutsele emnotfweni.

Lawa ngemavi eMphatsi Lomkhulu (i-CEO) we-Ejensi Yekutfutukiswa Kwelusha Kuvelonkhe (i-NYDA) Khathutshelo Ramukumba, kuphawula kwakhe lakwente ngesikhatsi hulumente acedzelela Inchubomgomo Yavelonkhe Yelusha yanga-2015 kuye ku-2020 (i-NYP 2020) letawudlala indzima lebalulekile ekutfutukiseni lusha lwalelive.

Le-NYP 2020, ibhalwe kanye nebantfu labasha balelive, kulindzeleke kutsi isite ekuloleni lusha lube takhamuti letikhutsele naletikhicitako luphindze lubeke i-NYDA endzaweni letakwenta kutsi isebente ngalokuphumeleli-sako ekubukaneni netindzaba telusha.

Bantfu labasha bavume imikhakha lemene lebalulekile: ingucuko nekutibandzakanya kutemnotfo, temfundvo, kutfutukiswa kwemakhono kanye nemafuba esibili, temphilo nekulwa nekusetjentiswa kwetidzakamiva kabi kanye nekwakha sive, kubumbana kwemmango kanye netakhamuti letitibandzakanyako emimangweni yato.

Ngekuya kweLihhovisi LeLubalobalo laseNingizimu Afrika, lusha lwenta lange-40% ebantfu sebakhe kantsi lange-36% abo awasebenti.

Le-NYP 2020 itawusita kubukana nalensayeya ngetinhlelo tekutfutukiswa kwelusha letitawusabela etidzingweni telusha - tindhlelo



Lenchubomgomo Yelusha Lwavelonkhe yanga-2015 kuye ku-2020 itawunika bantfu labasha litfuba lekutfutukisa kanye nekufaka sandla ekwakheni umnotfo.

letenta bantfu labasha kutsi batilungiselele likusasa labo.

I-CEO ye-NYDA Ramukumba itjele iVuk'uzenzele kutsi le-NYP 2020 kube tindzaba letimnandzi kubantfu labasha njengobe kutabasita ekutsatse- ni indzawo yabo lefanele kutemnotfo.

"Ngicabanga kutsi insayeya lokumele lusha lwalamuhla luyitsatse njengensayeya yalo nome kutiveta kwabo ngumzabalazo wemuntjintjo lwetemnotfo," ushito njalo.

NgeNhlaba 1976, bafundzi labavela etiko-lweni letehlukene babulawa kabuhlungu nguhulumende welubandlululo ngesikhatsi emaphoyisa avulela tindhlanvu kubafundzi labebangakahlomi labashuca emigwacweni yaseSoweto balwa neMfundvo Lebandlululako, lebeyiphocela bothishela, phakatsi kwalokunye, kutsi basebentise siBhunu njengewelwimi lwekufundzisa etifundvweni letinyenti.

Sitfombe lesikhombisa umtimba wa-Hector Peterson lobekasashonile, umfana lomncane lobekangumfundzi wase-Morris Isaacson Primary School - lesatsatfwa kahle ngumtwebu- lititfombe lowatiwako Sam Nzima - satfumela umlayeto lowetfusako emhlabeni wonkhe.

Ramukumba utsite nakucatsaniswa nalela cembu lebantfu labasha, situkulwane salamuhla sisenhlanhleri ngobe linyenti lalo lifundzile futsi likwati kufinyelela kumatfuba ekutitfutukisa ngekweba.

"Ngekucabanga kwami iminyaka lenge-21 satfola intsandvo yelinyenti, umntfwana lo-mnyama nome umntfwana wem-Afrika ngete aya esikolweni kuyewutfole imfundvo kute atfole nome ngumuphi umsebenzi nje.

"Umcondvo wemntfwana wem-Afrika kumele kube nguloyo lotsi kuba ngusomabhizinisi ngulenyi indlela yekusebenta kute bakwati kuba bacashi, babe baniyo bemnotfo welive labo nekutsi bakwati kuba bakhi belive labo.

"Loko kimi kusho umzabalazo lusha lwalamuhla lokumele lubukane nawo njengemzabalazo kute lukwati kutfola inkhululeko yetemnotfo ekuphileni kwalo," kwasho yena.

INCHUBOMGOMO YELUSHA IBUKISISWA KAHLE

Lisekela Lendvuna ehhovisini laMengameli Buti Manamela kamuva nje liphofule luha-

Iyachubeka elikhasini le-6

Ichubeka isukela elikhasini le-1

ngco lokuvela ngaphandle.

"Lokutfolakele lokuhamba embili kuveta kutsi kusukela kwacala luhlelo lwekuheha, ingetulu kwe-9 000 imisebenti lemisha leseyivuliwe kantsi umkhakha we-BPS ungumkhakha lohamba embili ekuheheni kusisa nasekuvulweni kwemisebenti lemisha, ikakhulukati kulabo labaneminyaka yebudzala le-18 - 35, lapho kuvulwa kwemisebenti kudzingeka kakhulu khona," kwasho Indvuna.

EMATIKO AVELONKHE KANYE NEWETIFUNDZA

I-DPME yetfule tindlela letinyenti tekugcugcutela nekutjala tindlelanchoo tekubeka liso nekuhlala emsebenzini wahulumende.

Yengete ngekutsi litiko letfule Indlela Yekuhlala Kulawula Kuphatsa (i-MPAT) njengendlela letawugcila kutindlelanchoo tekulawula kuphatsa ematikweni avelonkhe kanye newetifundza.

"Kusukela ngeNyoni 2014, onkhe ematiko avelonkhe kanye newetifundza abamba lichaza kutindlelanchoo tekulawula kuphatsa lokwachutjwa yi-DPME.

"Imiphumela yangaphambili ivete kutsi tincenye tekusebenta letinge-29 kuleto letinge-33 letahlolwa tikhombise kwenta ncono ngemiphumela, nanobe nje kube nekwenyuka kulamanye wemazinga kwagcilwa kakhulu kulokucuketfwe eluhlelweni lwekucubungula."

LUCINGO LOLUPHUTFUMAKO LWELIHHOVISI LWAMENGAMELI

Mayelana neLucingo Loluphutfumako Lwelihhovisi IwaMengameli, Indvuna Radebe itsite hulumente uchubekile nekuniketa tinsita ebantfwini kutsi bafake tikhalo nemibuto yabo.

"Njalo ngemnyaka, sikwati kucubungula cishe tikhalo nemibuto lemisha leti-20 000. Kudzimata kube ngunyalo sirekhode tikhalo nemibuto leti-207 000 elucingweni loluphutfumako. Lange-35% yimibuto levamile kantsi lange-65% tikhalo.

"Ngingabika kutsi kuto tonkhe tikhalo nemibuto lesiyitfolile, lange-94% arekhodwe njengalasonjululiwe kantsi la-6% asengakasonjululwa."

KUKHOKHELA BETFULITINSITA NGESIKHATS

Indvuna itsite kukhokhela betfulitinsita ngesikhatsi kungilenyi yetincenye i-DPME leyente luhlatiyo lwayo ematikweni avelonkhe emkhatsini wa-2013 na-2014. Luhlatiyo luvete kutsi kube nekwenza ncono elinanini lelilingene lema-invoyisi lakhokhelwe kungakapheli tinsuku letinge-30.

Indvuna yengete ngekutsi ematiko etifundza akhombisa kwenta ncono kancane ngala-5% elinanini lelilingene lema-invoyisi lakhokhelwa kungakapheli tinsuku letinge-30.

"Tifundza tibike ema-invoyisi la-241 332 labita tigidzigidzi leti-R13,4, lakhokhelwe ngemuva kwetinsuku letinge-30 kanye nema-invoyisi la-356 079 labita tigidzigidzi leti R21,8, langetulu kwetinsuku letinge-30 langakakhokhelwa.

"Loku kukubuyela emuva ngalange-52% enanini lelilingene lema-invoyisi langetulu kwetinsuku letinge-30 nalangakakhokhelwa," kwasho Indvuna.

Itsite ematiko avelonkhe abike ema-invoyisi la-155 572 labita tigidzigidzi leti-R3,8, letakhokhelwa ngemuva kwetinsuku leti-30. Kusenjalo, ngesikhatsi lesifanako, ema-invoyisi la-62 887 labita tigidzigidzi leti-R2,1 langetulu kwetinsuku leti-30 asengakakhokhelwa.

Indvuna Radebe itsite kukhokhelwa kwebetfulitinsita kungakapheli tinsuku letinge-30 kuseseinsayeya lenkhulu, futsi kunemtselela lomkhulu emabhizinisini lamancane, labuye afake sandla emnotfweni lokhulako kanye nasekuvuleni imisebenti.

"Ngako sihlele kusungula luphiko lolukhetsekile lwekubeka liso kukhokhelwa etinsukwini letinge-30 ngemandla kanye nekusombulula lokucineka lokukhona, yasho ingeta.



Letivela e-Union Buildings

Umlayeto lovela kuMengameli

Kwakha umphefumulo wesive setfu

Nangenta umsebenzi wami wekusebentela sive, ngenhlanhla yekubona onkhe emakhona elive lakitsi lelihle.

Kuvakashela kwami yonkhe imimango yaseNingizimu Afrika kuhlala njalo kwenta imiva leyehlukene.

Kunetindzawo lapho khona lifutse lelibandlululo lisabonakala kakhulu – ngekutsi bantfwana basemaphandleni bahamba ngetinyawo emabanga lamadze nabaya esikolweni, nome kusetjentiswa budlabha kwetjwala emkhatsi wetisebenti tasemapulasini kuletinye tindzawo.

Lelifutse likhona ngendlela yekutsi bobabe nabomake bayatihudvula nje bahambisa sikhatsi emakhoneni etitaladi nome emashibhini, ngobe emakhono nelizinga lemfundvo yabo akubavumeli kutsi bahlanganyele ngalokuphelele emnotfweni waseNingizimu Afrika.

Futsi bahlala etitaladini taselokishini letingasemuva lapho khona emagenge enta budlwangudlwangu kubahlali kanye netinkinga tetenhlalakahle njengekusebentisa budlabha tidzakamiva, kukhulelwa kwelusha nebudlova betenhlalakahle kuyindlela yekuphila kubantfu labanyenti.

Kepha, ngivamise kuvakashela lemi-mango ngobe hulumente usebenta nebahlali kwenta kutsi timo tekuphila tibencofo futsi setama kwenta umehluko, nome sesivele siwentile umehluko etindzaweni letinjalo.

Ngulapho ngibona khona tikolwa, imifolamphilo lemisha nemarobhothi akhanyisa. Lapha ngulapho ngibona khona emakoporas abomake lewondla iminde-ni futsi kukhicitwa nemikhicito letsengiswa ngesheya kulamanye emave. Lapho ngulapho ngihlangana khona netisebenti tetemphilo letisebenta ngekutikhandla emakhoneni etindzawo talelive letfu letisemaphandleni banakekela tigulane nome emaphoyisa labeka timphilo tawo engotini babukana netigebengu letinesibhuku.

Lapha ngulapho futsi ngibona khona imigwaco lemisha lapho kwakhwe kwaba ngumgwaco lolubhubhushi; kwakhiwe emanyuvesi netibhedlela letinsha etin-

dzaweni lapho khona bantfu bebakadze bahamba emabanga lamadze mbamba bayotfolo imfundvo nome tinsita tetemphilo; emafekhthri naleminyane imishini lemikhulu yetimboni lapho khona bantfu bebete imisebenti futsi bete nelitsemba.

Kubona lesivini nelizinga lekutfutfuka eveni lakitsi kunginika inshisekelo yekusebentela bantfu bakitsi baseNingizimu Afrika, futsi kunginika nekutetsemba kutsi angeke sehluleke kuchubekisela iNingizimu Afrika embili.

INingizimu Afrika iyindzawo yinye lekwakhiwa kuyo lapho khona imishini lemikhulu yekwakha (ema-crane) nalabasebenta kumadolobha lamakhulu etfu basita kukhulisa umnotfo wetfu, tigulumba, imisele nemsebenti yahulumende lekhulisiwe etindzaweni tetfu tasemaphandleni tiletsa sakhiwonchanti sesimanje manje nematfuba etenhlalakahle kutakhamuti tetfu.

Kepha kukhula kwesive setfu akusiko nje kuphela loko lesikwenta ngetandla tetfu.

Lokubaluleke kakhulu, kumayelana naloko lesikwenta ngetinhlitiyo netingcondvo tetfu.

Tihloko tetindzaba atisitjeli indzaba lephelele ngeNingizimu Afrika ngaso sonkhe sikhatsi. Kepha tisitjela tindzaba letibalulekile – futsi ngalesinye sikhatsi tindzaba – letiphathamisanako letisinika insayeya yekutsi sisebente ngekutikhandla silungise indlela lesitiphatsa ngayo njengobe senta etindzaweni tetfu lekwakhiwa kuto.

Esikhatsini lesingasidze kangakanani, letindzaba tifake ekhatsi umbiko wesehlakalo lapho khona bantfwana esikolweni lesinye saseMphumalanga Kapa bale kudla kudla esikolweni ngobe bapheki bako emakhishini lasesikolweni bachamele emabhakedeni lafaka lokudla. Labomake batsi lidze kakhulu libanga labalihambako nabasuka emabaleni esikolwa baya emithoyi.

Lokunye lokwehluka kakhulu kunaloku, kubekhona kusabalaliswa kwevidiyo letfusanako lebeyikhombisa ummango waseWitbank wala kusita lenye indvodza lebeyilunyeke ngemlilo njengesijeziso sayo sekweba daladi welitfusi esiteshini sagezi.

Betindzaba batsi lendvodza yabonakala ishweleta incenga bantfu kutsi bayibitele i-ambulesi ngesikhatsi sikhumba sayo lesinye silenga emtimbeni wayo. Kepha esikhundleni



Imiklamo yesakhiwonchanti lechubeka kulo lonkhe lelive lakitsi isita umnotfo welive lakitsi kutsi ukhule. Nanome kunjalo, njengebantfu baseNingizimu Afrika sidzinga kwenta kancono simo setinhlitiyo netingcondvo tetfu kute sente sive sikhule siye embili.

sekutsi bente njalo, bavele nje bayibunganyela bayibukela isetinhlungwini.

Lendvodza yahamba ngetinyawo yaya emtfolamphilo lodvutane futsi yakhona nekufika esibhedlela kepha yabese iyashona ngemuva kwemahora lambalwa.

Ngaso sona lesi sikhatsi lesifanako, kwabikwa kutsi eFreyistata somabhizinisi loneminyaka lenge-47 budzala kanye nendvodzana yakhe leneminyaka le-16 baboshiwe mayelana nesehlakalo lapho khona lendvodzana yalobabe isolwa ngekungcunula yabuye futsi yakhahlabeta ngekwegcondvo gadzi loneminyaka lenge-57 budzala ngekutsi enteinja yakhe kutsi iye emacasinu nalogadzi.

Letinye talethlakalo angeke sewute uticabange kutsi tingentiwa bantfu baseNingizimu Afrika labagcina umtsetfo, labatsandza kuthula, kepha kuliciniswa kutsi tintfo letimbi kangaka tiyincenye yendlela ummango wetfu lowakhiwe ngayo.

Emalangenini nje lambalwa lendlulile, sigubhe umkhosi weLusuku Lwenkhululeko; lusuku lolusikhumbuta ngendlela lesiyihambile kute sifike kuNingizimu Afrika lencono, lete lubandlululo, futsi lusuku lolugcila kuLucwebu Lwemalungelo eLuntfu lakuMtsetfosisekelo wetfu, lokusho kutsi, ngandlela tsite, timo nemibandzela yenkhululeko yetfu.

Mayelana nekulingana, Lucwebu Lwemalungelo eLuntfu lutsi kute umuntfu lekufanele kutsi abandlululwe.

Mayelana nesitfunti semuntfu, Lucwebu Lwemalungelo eLuntfu lutsi wonkhe umuntfu unesitfunti sebuntfu lesisisekelo lekufanele kutsi sikhlonishwe.

Lucwebu Lwemalungelo eLuntfu lubekwa kutsi wonkhe umuntfu unelilungelo lekuphila, nekutsi futsi wonkhe umuntfu unelilungelo lekungaphatfwa nome azejiswe ngesihluku, nome ngendlela yebulwane nome lemehlisa sitfunti.

Lucwebu Lwemalungelo eLuntfu lubuye futsi lutsi wonkhe umntfwana unelilungelo lekutfolo kudla lokusisekelo, indzawo yekuhlala, tinsita tekunakekelwa ngetemphilo letisisekelo netinsita tetenhlalakahle, nekuvikelwa ekuphatfweni kabi, nasekuhlukunyetweni nome kungcunulwa.

Kuyadzabukisa kutsi bantfu labanyenti baseNingizimu Afrika baphila timphilo tabo – bese balimata timphilo talabanye – kube sengatsi kute lamalungelo lankha.

Kuphindze futsi kuyadzabukisa kutsi lapho bantfu banyatsela Lucwebu Lwemalungelo eLuntfu bayatsetselelwa babuye futsi bavikelwe ngemalunga emindeni yabo nome emmango, labavimba emaphoyisa ekutsini aphe nye nome tiffunyuwa tetfu temmango ekutsi tingenelele.

Loku kuphambene nemitamano yetfu yekuchubekisela iNingizimu Afrika embili.

Sindzinga bantfu baseNingizimu Afrika kutsi bangabuki nje kuphela kutsi lelive ligucuka kangakanani ngekubuka intfutfo yetfu lephatsekako, kepha babe bangasiti lelive kutsi ligucuke libe ncono ngekutsi bahlolisise futsi batiphatsa kancono futsi bente tibopho tabo njenge-takhamuti taseNingizimu Afrika.

Kute linani letindlu letinsha, imigwaco, emafekhthri nome titeshi tekuphehla gezi letingachubekisela embili intfutfo yetfu njengobe kungentiwa kukhombisa umoya webuntfu nekuba takhamuti letikahle.

Iminyaka nje lesiphohlongo leye-ndlulile, Khongolose (i-ANC) wakhapha idokhumenti yengcoco leneshloko lesitsi i-RDP of The Soul lebeyibeka indlela yekugucula live letfu ngekutsi kwakhiwe kubuye kutfutfukiswe umoya webunye welive lonkhe.

Ledokhumenti yabeka kutsi “bekungumoya webantfu baseNingizimu Afrika lochuba tinchubo tetfu tetepolitiki, temnotfo netenhlalakahle”.

Watsi: “Tonkhe tinkholo tivumelana ngeliciniswa lekhulu letenkhulu lekungulona lichuba buntfu, futsi sidzinga kusemukela lesivumelwane njengenkundla yekwetfula intfutfo lensha. Sinemagugu lafananako kuba lutsandvo, injabulo, nome kuthula; kwetsembeka, bulungiswa nome similo, umusa, sibopho nome kwetsembeka, futsi konkhe loku kuvela kubuntfu.”

Iminyaka lesiphohlongo lelandzelako, sitawube sibukene netinkinga letifananako nga-2015.

Ema-crane etfu, bomakalabha, imisebenti nemandla ekusebentisa imali angeke kutawuba lite nangabe asintjintji indlela lesicabanga ngayo, siyive futsi siyente ijule ngekhatshi kitsi.

Kwakha iNingizimu Afrika lencono kucala ngekhatshi; asicaleni sisebente.



Asisebentisaneni sonkhe sakhe iNingizimu Afrika lencono.



TEMPHILO

Luhlelo lwetempilo lolucinile lwawo wonkhe umuntu

Amukelani Chauke

Indvuna Yetempilo, Dkt. Aaron Motsoaledi, itsi hulumente kudzingeka agucule indlelalisu yemcombelelo wakhe kute kuciniswe luhlelo lwetempilo yesive.

Indvuna itsite lendlelalisu itawuphindze ifake ekhatsi kubeka embili kuvinjelwa kwetifo kanye nekutfutufukisa tempilo kute kuciniswe kutsi bantfu batfola tempilo letisezingeni lelikahle.

Indvuna isho loku ngesikhatsi yetfula Umcombelelo welitiko lakhe ePhalamende kamuva nje.

Lomcombelelo uyinkhulumo leyetfulwa yiNdvuna leyendlala tinhlelo, emazwibela kanye netintfo letihamba embili telitiko lakhe.

Uma live kanye naleminyane imibuso yase-Afrika itawuchubekisela embili lelivekati, tinhlelo tetempilo yesive kumele ticiniswe kute kusitwe umkhakha wetempilo kutsi uvimbele uphindze ulawule kucubuka kwetifo letinjenge-*Ebola*, imenenjayithisi, Sifo Sesifuba (i-TB), i-HIV ne-AIDS kanye navendle,

kwenta sibonelo.

Kungaleso sizatfu kunkhomfa yakamuva Yenhlango Yetempilo Yemhlaba lebeyibanjelwe eBenin, Tindvuna tetempilo tatsatsa sincumo sekutsi endzaweni yekuba netinhlelo letilandzelanako (kwehlukana umcombelelo wekulwa namalaleveva, vendle, i-HIV ne-AIDS, i-TB, phakatsi kwalokunye) bohulumente kumele basise ekucinisweni tinhlelo tetempilo yesive.

“Sikholwa kutsi loko lokutawusita i-Afrika tinhlelo tetempilo leticinile letitawubese tibukana nanome ngukuphi kucubuka lokovelako ngobe... kahle kahle asikwati lokutawulandzela.

“Itolo bekuyi-HIV ne-AIDS, lamuhla yi-*Ebola* ne-TB kusasa kutawube kuyini? Asati kodvwa sikholwa kutsi lokunye kucubuka kwetifo ngelishwa kusendleleni,” kwasho Indvuna.

Yengete ngekutsi kucubuka kwetifo lakhulume ngato kubangwa kugucugucuka kwesimo selitulu, kwandza kwekhlukunyetwa kweluntu etinzaweni taletinye tinhlolobunye ekufuneni kudla, emanti nendzawo yekuhlala kanye nekwardza njalo kwesikhatsi sangemuva kwekubulawa kwemagciwane.

Indvuna itsite ngemnyakamabhuku wanga-2014/15, litiko lakhe belimatasatasa ngetinhlelo tekuciniswa luhlelo lwetempilo yemmagu.

“Loku kutawufaka ekhatsi kuvikela tifo, kukhutsata tempilo kanye nekucinisekisa kutsi bantfu bakitsi batfola tempilo letisezingeni lelihle.

“Loku kukutfunywa kwetfu kantsi sitakuchuba ngemandla”.

KUVIKELA KUNCONO KUNEKWE-LAPHA

Indvuna Motsoaledi itsite tifo tivame kutsatfwa njengemphumelelo yetesayensi, kantsi kuvikela akunikwa lifanako.

Itsite lesi ngiso sizatfu sekutsi kungani umkhakha wetempilo, nome ngusiphi sehlakalo lesingasisihle lesentekile besitsatfwa ngekushesha njengekuwa kweluhlelo lwetempilo.

“Nanome bahlelelimuva bangatsini, ngete sakuyekela nome sithene emandla incenye yekuvikela yeluhlelo lwetempilo, kuphambana naloko, kutakuba sisekelo seluhlelo lwetfu lwekuciniswa luhlelo lwetempilo.”

Litiko letfule imijovo lemisha nga-2009 eluhlelweni lwalo loluvamile lwekugoma, kufaka ekhatsi kugomela kucinana kwemoya, i-*pneumococcal conjugate*, kanye nekugomela ligciwane levayirasi, i-*rotavirus*.

Tifo letiphatselene nemoya letinjengemenjayithisi kanye nenyumoniya titsatfwa njengaletinebungoti lobukhulu eNingizimu Afrika kanye nasemhlabeni wonkhe, titifo tesibili letibulalako ngemuva kwe-HIV ne-



Indvuna Yetempilo Dkt. Aaron Motsoaledi itsi litiko layo litawucinisekisa kutsi bantfu batfola tempilo letisezingeni lelihle.

AIDS kubantwana labaneminyaka yebudzala lengaphansi kweminyaka lesihlanu.

Indvuna itsite imijovo yekuvikela iholele ekutsaneni litiko linciphise letifo ngalange-70%.

Umdlavuta welidlala lesidvodza: Ungawuncoba

Sikimi Setekwelashwa Kwetisebenti Tahulumende

Indvodza iyinye kulange-23 aseNingizimu Afrika iphetfwe ngumdlavuta welidlala lesidvodza. Nanobe lesifo siphatsa emadvodza lamanyenti, asinakwa ngalokwenele.

Dkt. Stan Moloabi, Umphatsi Lomkhulu Wetempilo kuSikimi Setekwelashwa Kwetisebenti Tahulumende (i-GEMS) ukholwa kutsi kunyenti lokumele kwentiwe kufundzisa emadvodza aseNingizimu Afrika ngalesifo – ikakhulukati uma lesifo sitfolakele kusesikhatsi siyelapheka.

“Emadvodza lamanyenti aseNingizimu Afrika ati kancane ngemdlavuta welidlala lesidvodza kanye newemasenze,” isho njalo.

Kwelashwa kwalesifo kube ncono kuleminyaka kantsi uma sitfolakala ngekushesha ematfuba ekusindza kwesigulane ayakhula.

Umdlavuta welidlala lesidvodza wenteka etindlalani taladvuna — lokusalintongomane lokuncane lokwakheke njengelidlala lokuyincenye yeluhlelo lwekutala lalomdvuna. Umdlavuta welidlala lesidvodza wenteka nangabe emaseli langakavami akhula elidlaleni lesidvodza.

NGUBANI LONGATFOLA UMDLAVUTA WELIDLALA LESIDVODZA?

Umdlavuta welidlala lesidvodza uhlasele labadvuna bato tonkhe tinhlango kanye neminyaka yebudzala, kepha labadvuna labangetulu kweminyaka lenge-50 basengotini lenkhulu yekuhlaselwa ngulesifo kunalabo labasebancane.

“Ngalokuvamile, uma umuntu aba mdzala uba sengotini yekutfola lesifo,” kuphawule Dkt. Moloabi.

Labadvuna labangetulu kweminyaka lenge-40 kumele bavakashele dokotela wabo kute bahlolwe umdlavuta welidlala lesidvodza kanye eminyakeni lembili. Labadvuna labangetulu kweminyaka lenge-50 kumele

bahlolwe njalo ngemnyaka, weluleke kanjalo.

TIMPHAWU TEMDLAVUTA WELIDLALA LESIDVODZA

Etimeni letinyenti umdlavuta welidlala lesidvodza awunato timphawu. Lesi ngulesinye setizatfu tekutsi kungani kubalulekile kutsi labadvuna bahlolwe ngudokotela wabo wemndeni. Labadvuna kumele babuke loku lokulandzela:

- Bumatima bekuchama.
- Bumatima bekucala nome kumisa kugeleta kwemchamo.
- Ingati emchameni.
- Buhlungu nome imiva leshisako nawuchama.
- Nome ngukuphi kwaloku lokungenhla kuhlange nebhulungu encenye lengaphansi kwemgogodla, kumatsanga langenhla nome endzaweni yesiklanyeni.

“Nanome letimphawu tingaba yinkhomba nje kuphela yekwesuleleka, kungenteka futsi kube sicalo semdlavuta welidlala lesidvodza, ngako kubalulekile kutsi tiphenywe,” kusho Dkt. Moloabi.

KWELASHWA KWEMDLAVUTA WELIDLALA LESIDVODZA

Kwelashwa kwalesifo kuya ngekutsi sesichubeke kanganani, siluhlobo luni lwemdlavuta kanye nangempilo yesigulane.

Kunetindlela letinyenti letikhona tekwelapha umdlavuta welidlala lesidvodza letifaka ekhatsi kuhlindvwa, kuhlala ugadziwe nome kwelashwa kwemahomoni – konkhe kuya ngekutsi ukhula njani umdlavuta.

UWUVIMBELA NJANI UMDLAVUTA WELIDLALA LESIDVODZA

Kuphila imphilo lekahlle kungavimbela timo tekugula letinyenti letingahlasele labadvuna kufaka ekhatsi umdlavuta welidlala lesidvodza.

“Kudla kudla lokunempilo, kutivocavoca, kuyekela kubhema nekunatsa kakhulu kanye nekucinisekisa kutsi uhlala uphile kahle, kweluleka Dkt. Moloabi.

Wengete ngekuhlolwe ngetempilo njalo ngemnyaka, ikakhulukati uma unemlandvo wemndeni lonemdlavuta, kungasita kusindzisa imphilo yakho.

Sitfutwane: yini lokumele uyati

Sikimi Setekwelashwa Kwetisebenti Tahulumende

Sitfutwane, lesibuye satiwe njengesifo sekubambeka, sihlasele emakhulu etinkhulungwane tebantfu bato tonkhe tinhlango netindzawo labavela kuto eNingizimu Afrika.

Sifo sekubambeka sisimo lesivamile lesihlasela ingcondvo kanye neluhlelo lwekusebenta kwemiva. Silinganiso sithi munye walaba-100 bebantfu baseNingizimu Afrika batawuhlaselwa sitfutwane esikhatsini lesitsite etimphilweni tabo.

Dkt. Stan Moloabi, Umphatsi Lomkhulu Wetempilo kuSikimi Setekwelashwa Kwetisebenti Tahulumende utsi wonkhe umuntu kumele afundze ngalesimo setempilo nekutsi yini lokumele kwentiwe nakwenteka lomunye umuntu aba nesifo sekubambeka.

“Linyenti letfu livame kuhlangana nemuntu lonesitfutwane, nome sifo sekubambeka, ngalesinye sikhatsi etimphilweni tetfu,” wengeta.

“Sifo sekubambeka kungaba netimbangela letinyenti letehlukene kantsi nome ngabe ngubani angaphatfwa sifo sekubambeka esikhatsini lesitsite emphilweni yakhe. Bahlali baseNingizimu Afrika kumele bakucabange loku ngembi kwekutsi bahlulele labo labanesifo sekubambeka nome sitfutwane.”

Sifo sekubambeka sikugijima kwemsebenzi wekuchumana engcondvweni lokubese kuhlasela indlela umuntu lativa nome enta ngayo sikhatsi lesitsite.

Sifo sekubambeka singenteka ngetindlela letinyenti letehlukene kantsi singahlasele bantfu labehlukene ngetindlela letehlukene. Letinye tifo tekubambeka tingaba sendzimeni; umuntu angatva angekho kuleyo ndzawo umuzwana nje nome lembili futsi angakucapheli loko kwekutsi ube nesifo sekubambeka.

Kulabanye, sifo sekubambeka kakhulu, umuntu angalahlekelwa ngumcondvo, umtima wakhe ungacina futsi angenta iminyakato ledlukutako.

Sifo sekubambeka singalawulwa ngemitsi

nome ngalokunye kwelashwa etimeni letinyenti.

TIMBANGELA TESIFO SEKUBAMBEKA TIFAKA EKHATSIS:

- Sitfutwane singatsatselana.
- Kwesuleleka kwengcondvo loku-njengemenenjayithisi kanye ne-*encephalitis*.
- Tigaca.
- Kungalingani kwemakhemikhali engcondvweni lokubangwa timo letinjengekwehla kwashukela engatini kanye nesifo sashukela.
- Kuyekela tjwala.
- Kusetjentiswa kwetidzakamiva letitsite tasemgwacweni.

“Khumbula kutsi linyenti lebantfu labanesitfutwane lelapheka kahle ngemitsi, ngako wonkhe umuntu lophetfwe ngulesimo kumele agcugcutelwe kutsi aye kudokotela wakhe,” kwengete Dkt. Moloabi.

UNGABUKANA KANJANI NEMUNTU LOBAMBEKILE

Leti nguletinye tetinyatselo lokumele titsatfwe nakubukanwa nemuntu lobambekile:

- Yenta lokusemandleni akho kuhlala ungetfuki.
- Biti tinhlelo telusito loluphufumako.
- Yetama kuvimbela kulimala ngekucinisekisa kutsi akukho edvutane nome lokufinyelelekako lokungalimata lomuntu.
- Tigcine ukhashane nendlela lelimateko – asikho sidzingo sekutama kukhiyela umuntu lobambekile.
- Ungafaki nome yini emlonyeni wemuntu.
- Uma sifo sekubambeka kwemuntu sesiphelile mbeke ahlale ngendlela yekuhlala yemuntu losandza kuvuswa. Gucula inhloko yalomuntu kute kutsi nome ngukuphi kuhlanta kungamunca malula ngemlomo uphindze ucinisekise kutsi baphefumula ngalokwetayelekile.
- Ungamniki loyo muntu lokusalungetjeti, imitsi nome kudla adzimate alulame ngalokuphelele.
- Hlala naloyo muntu adzimate alulame, lokumele kutsatse emkhatsini wemaminti lasihlanu kuya kulange-20.



LOKUNGEKHATSI

Albert Pule

Inchubo yekufakwa kweticelo tekubuyiselwa umhlaba luvu mela bantfu labemukwa imihlaba yabo ngesikhatsi selubandlululo kutsi bafake ticelo tekubuyiselwa umhlaba wabo kuleminyaka lesihlanu letako.

Kuvulwa kwabusha kwekufakwa kweticelo kuhlose bantfu labehleleka kuhlangabetana nemncamlajucu wanga-1998.

IVuk'uzenzele ikunika inkhombandlela lebanti mayelana nekutsi usifaka njani sicelo.

SIYINI SICELO SEMHLABA?

Sicelo semhlaba sicelo lesibhaliwe lesentiwa ngumuntu, situkulwane semuntfu ngco, njengemabilifa nome ummango kutsi ubuyiselwe umhlaba.

LIYINI LILUNGELO LEMHLABA?

Lilungelo lemhlaba lililungelo lemhlaba lelibhaliwe nome lelingakabhaliswa, inshisekelo yetisebenti letibahlali kanye nebelani betitjalo, tinshisekelo ngekwenksetso wetemdza nome inzuzo yekuhlala sikhatsi lesingetulu kweminyaka le-10.

Bantfu kumele babe bahlale emhlabeni nome kumele abe nebufakazi ngedokhumenti, sib. itayitela, invume yekuhlala, njll, kute babe nelilungelo lemhlaba.

NGUBANI LONGAFKA SICELO SEMHLABA?

Umuntu nome ummango lowatsatselwa umhlaba ngemuva kwamhla ti-19 Inhlaba 1913 ngenca yemitsetso yelubandlululo yesikhatsi sangaphambili nalabangamange bancephetelise kahle ngesikhatsi sekutsatselwa kwemhlaba.

NGUBANI LONGEKE AFAKE SICELO SEMHLABA?

Labo labafaka ticelo ngaphambili batfola umhlaba nome sincephetelo semali ngete bafake sicelo futsi nge-lilungelo lekutsatselwa lokufanako.

Umangabe wafaka sicelo ngaphambili kepha wangancephetelwa, tfole bufakazi bekutsi lihovisi lesifundza linesicelo sakho sekucala ngembi kwekutsi uphindze ufake sisicelo.

Ungafaki sicelo lesisha nangabe sicelo sakho sisachutjwa. Akukho semtsetfweni kufaka sicelo ngendlela lenenkohlakalo ngekutsi ungadzali letinye tinhlangothi letinenshisekelo.

EMADOKHUMENTI LOKUMELE ALETFWENAKUFAKWA SICELO

- Ikhophi lecinisekisiwe yamatisi loluhlata waseNingizimu Afrika lonebhakhodi nome Likhadi-matisi.
- Incwadzi lesayiniwe lekugunyata kutsi umele umndeni nome ummango wakho, lesayinwe bofakazi lababili (emandla emmeli), uma ngabe umele umndeni nome ummango wakho.
- Luhlu lwebantfu lobamele.
- Incwadzi levela kuNhlolo Yenkantolo Lephakeme uma ngabe ungumabi wemafa.
- Sincumo lesibhaliwe lesivela emhlanganweni wemmango, lesayinwe ngumuntu lobekachuba umhlangano, uma ngabe ufaka sicelo esikhundleni semmango (sincumo semmango).

NGULUPHI LWATISO LOLUDZINGEKAKO?

- Inchazelo yemphahla, sib. ligama leliphulazi, i-ERF nome inombolo yesitandi nangabe isenzaweni lelidolobha.
- Umnyaka wekutsatselwa umhlaba.
- Sincephetelo lesakhokhelwa ngaleso sikhatsi.
- Imininingwane yemuntu lowalahlekelwa lilungelo.
- Imininingwane yemfakisicelo kanye nesigaba sakho lotsatsa ngaso tinyatsele, sib. lomele ummango, indvodzana, mabilifa, njll.
- Umlandvo wekwemukwa umhlaba.

USIFAKA NJANI SICELO-SAKHO SEKUBUYISELWA UMHLABA

Ticelo kumele tifakwe ehovisi lekufaka ticelo lelikhatsiwe kusetjentiswa lifomu lefanele, lelitawufakwa kungcondvomshini ngendlela ngesikhatsi sekufakwa kwalo.

Emafomu ngete asatjalaliswa. Kumele uvakashele lihovisi lekufakwa kweticelo kute ufake sicelo.

Unesikhatsi kudzimate kube ngumhla ti-30 Inhlaba 2019 kutsi ufake sicelo. Emahhovisi ekufaka ticelo labomahambangendlwana atawuvakashela tigodzi ngesikhatsi sekufakwa kweticelo.

Usifaka njani sicelo sekubuyiselwa umhlaba

TINYATSELO LOKUMELE TILANDZELWE KULENCHUBO YEKUFAKA TICELO

SINYATSELO SE-1: Kwemukelwa

Tisebenti etafuleni lekwemukela bantfu titawubuka kutsi uphetse onkhe emadokhumenti lafanele yini bese akunika teluleko



SINYATSELO SE-2: Kufakwa kweticelo kungcondvomshini

Tisebenti esigabeni sekufakwa kweticelo kungcondvomshini titawufaka sicelo sakho kungcondvomshini



KUFAKA SICELO KUMAHHALA



SINYATSELO SE-4: Satiso

Utawutfole i-SMS kungakapheli ema-awa lange-48 ngemuva kwekufakwa kweticelo lecinisekisa kutsi sisitfolile sicelo sakho. Sicelo sakho sitawuphenywa kantsi utakwatiswa ngenchubekembili njalo ngetikhatsi letitsite, nome ngekufuna kwakho.

SINYATSELO SE-3: Kucinisekisa

Utawutfole incwadzi ngemuva kwekufakwa kwemininingwane yesicelo sakho kungcondvomshini. Lencwadzi itawuba nenombolo yereferensi lehlukile lecinisekisa kutsi ufake sicelo ngalokuyimphumelelo.

ULANDZELELA KANJANI:

Ungashayela inombolo yelucingo yamahhala 0800 007 095 nome utsintsane nanome nguluphi lihovisi lekufaka ticelo kulawo la-14 eveni lonkhe.

Ungasifaka kuphi sicelo sakho?

EGauteng: 9 Bailey Street, Corner Steve Biko and Johannes Ramokhoase Street, Arcadia, Pretoria. Lucingo: 012 310 6500

EFreyistata: Old Postbank Building, (Corner East Burger and Selbourne Street, Bloemfontein). Lucingo: 015 430 0444

KwaZulu-Natal: Umhlaba House, 139 Langalibalele Street, Pietermaritzburg nase158 -160 High Street, Vryheid. Lucingo: 033 341 2674

EMphumalanga Kapa: Old SARS Building, 22 Station Street, East London nase-66 Prince Alfred Street, Queenstown. Lucingo: 043 722 1487

ENyakatfo Kapa: Hyesco Arcade, 4 - 8 Old Main Road, Kimberley. Lucingo: 053 807 5700

ENyakatfo Nshonalanga: Unit 4 Bathaping

Street, (Eceleni kweSakhiwo saseSARS), Mmabatho nePrime Plaza Building 52 Market Street, Vryburg.

Lucingo: 018 389 9658/9600

ENshonalanga Kapa: Van der Sterr Building, Rhodes Avenue, Mowbray, Cape Town and 33 Shamrock Place, 97 York Street, George. Lucingo: 021 658 4300

ELimpopo: 61 Biccard Street, Polokwane. Lu-Cingo: 015 284 6300

EMPumalanga: Restitution House, 30 Samora Machel Drive, Mbombela ne 23 Hi-tech House Corner Botha and Rhodes Streets, eMalahleni. Lucingo: 013 752 4054

Umtfombolwati: Ikhomishini Yekubuyiselwa Kwemalungelo Emhlaba

Ichubeka isukela elikhasini le-2

mbo lwekuvakashela bantfu lapho licicene nebantfu labasha kulo lonkhe lelive mayelana nekubuyeketwa kwe-NYP kute litfole luvo, kukhatsateka kanye netiphakamiso tabo kulenchubomgomo leleluhlaka.

Ramukumba utsite kubuyeketwa kwalenchubomgomo kulitfuba lwebantfu labasha kutsi babuke inchubekembili leseventiwe ekwefuleni kutibophelela kwe-NYP kuleminyaka lengetulu kwalesihlanu leyengcile.

“Ngako kusinika litfuba lekusho loko besikubeke embili kuleminyaka lesihlanu leyengcile nekutsi ingabe sikuzuzile yini besitibophelele kuto kusenjalo, luhlolo lwekutsi ingabe timo tebantfu labasha setigucukile yini kusukela ngaleso sikhatsi.

“Uma ngabe timo tebantfu labasha atikagucuki, kumele site netisombululo letinsha tekubukana netinsayeya kanye nekwakha simo lesivumako,” washo engeta.

Ramukumba utsite lenchubomgomo kumele, ngemuva kwekuba sekuhlanganiswe yonkhe imibono kuloluhlaka, ibe netiphakamiso tekutsi singakhiwa njani

simo lesitawugcugcutela kutfutukiswa kwelusha.

“Ngekubona kwami, kumele kwakhiwe simo salabo labafuna kuya esikolweni kutsi baye esikolweni. Ngalokunjalo, labo labahluleka kuphumelela matikulejenti wabo ngenca yetizatfu letitsite, kumele banikwe litfuba lesibili kute singacitsi likusasa labo.

“Labo bantfu labasha labaphumile eluhlelweni lwemfundvo futsi bete imfundvo letabenta bakwati kutfola umsebeni nome emakhono labangawanika timakethe kumele banikwe litfuba lekutfole emakhono, buchwepheshe nome emakhono labangawanika imakethe yemisebenti.

“Ngetulu kwaloko, kumakhono labanawo, kumele baniketwe kwesekelwa kutsi bange kutemabhezini batewukwati kubamba lichaza emnotfweni, nome ngabe bakhetse kusebenta nome kucala emabhezini abo,” kwasho yena.

LUHLELO LWEMISEBENTI LEMISHA LUSENDELENI

Ramukumba wengete ngekutsi kukhetfwe sigungu setati kutsi sibuke kuyo yonkhe imikhakha yetemnotfo kubona kutsi ngutiphi

timboni letingatsatsa bantfu labasha emisebentini. Letimboni tifaka ekhatsi kutfutukiswa kwelusha kuyo yonkhe imikhakha yahlumende, umkhakha wangasese, tinhlango letingekho ngaphansi kwahlumende (ema-NGO) kanye netinhlango temmango.

Sigungu sitawubhala luhlaka lweluhlelo lolutawubuka tinsayeya kanye nemigomo yekukhula eLuhlelweni Lwekutfutukisa Lwavelonkhe (i-NDP) - umbonochanti wahlumende kanye neluhlaka lwenchubomgomo yekutfutukisa lelive yanga-2030 - kubona kutsi ngutiphi tinhlalo letikhona njenganyalo letingasita bantfu labasha kutsi batfole imisebenti.

“Loluhlelo lwemisebenti lutakusho ngalokubonakalako kutsi ngumiphi imiklamo lokumele yentiwe - lucondzise etidzingweni tekukhula kwemnotfo njengoba siluvisisa ku-NDP emkhatsini wanyalo kanye na-2030 bese lusho kutsi ngutiphi tincenye nome ngutiphi timboni lokumele kugcilwe kuto kute kuvuliwe leminyame imisebenti yebantfu labasha,” kwasho yena.

Sigungu setati sifaka ekhatsi bochwepheshe labavela emanyuvesi lahlukahlukene kanye netisebenti letivela eHhovisi LeLubalobalo lase-

Ningizimu Afrika kanye naseMkhandlweni Welucwaningo Lwetesayensi Netimboni (i-CSIR).

Ramukumba utsite i-NYDA, ngato tonkhe tinhlalo tayo, isitile ngekutfutukiswa kwelusha.

“Lubalobalo lukhombisa kutsi emabhezini labhaliswe neKhomishini Yebunikati Be-mphahla kanye kubhaliswa Kwetinkampani (i-CIPC), ngulange-30% kuphela awo akwati kutsisimamisa ngetulu kwetinyanga leti-12.

“Besisolomane siniketela ngeluhlelo Lwetibonelelo Tavelonkhe Telusha iminyaka lemibili kantsi ngalesikhatsi, sente kubuyeketwa kwalawo mabhezini labekasitwa ngetimali ngaphansi kwaloluhlalo.

“Lucwaningo lwetfu luveta kutsi lange-54% emabhezini lasitwa ngetimali ngaphansi kweluhlelo lwetfu lwetibonelelo akwatile kuma acine ngetulu kwetinyanga leti-12,” washo engeta.

Kute utfole lolunye lwatiso Ngenchubomgomo Yavelonkhe Yelusha vakashela ku: www.gov.za